

Die Exklusiv-Massaaschn von der Eva

Der old Friedrich hot's so arch im Greiz, dass'er ofd nimmer wass, wie'er nachds im Bedd lieng soll. Droz seina 73 Jährla hot'er geecher die Schmerz'n kerzlich sogor mit Yoga offangd, obber bei denner komblizierdn Ibunga mussd'na jedsmoll sei Fraa widder auf die Baa helfn, wall'er immer so goa sehr verrenkd auf'n Bodn geleeng woa. „Am bessdn helfn hold immer nuch die gudn oldn Massaaschn“, hot lezda Woch'n a Schdammdischbruder im Werrdshaus gsochd, „mit Johanniskraut-Eel – und schee langsam und kreisfermich aufm ganz'n Buggl eireim“.

Der Friedrich hot dahamm gleich moll im Dellefonbuch in die „Gelben Seiten“ geblädderd, damit'er an Massäär find und mit ihn an Dermin ausmachd. Obber frooch net: Fimf verschiedna Massääre hot'er o'gerufn – und olla worn'sa beleechd bis drei Woch'n im Voraus. Der Friedrich wolld scho aufgeem, do hot'er erra zufällig in der Zeidung auf der vorlezdn Seidn bei die „Kleinanzeigen“ a winzichs Inserad glesen: „Für den Herrn: exklusive Massagen von Eva“ – und daneem die Dellefonnummer.

Der Friedrich hot so fodd ogerufn. Die Fraa am annern End wor unheimlich freindlich. „Freilich ich haben Termin frei“, hot'sa miteran leichd russisch'n Einschlooch auf'n Friedrich sei besorchda Frooch gsochd, „wenn wollen, Sie können gleich kommen“.

Zwa Schdund schbeeder hot der Friedrich an der Eva ihrer Diir geglingld. Die Eva hot aufgemachd – und na Friedrich iss die Luft weg gebliem: die Masseesa schdand in roda Schdrabbs vor ihn. „Dunnerwedder nei nuch amoll“ – merra hot der Friedrich vor lauder Iberraschung goa net raus gebrachd. Dann hot'na die Eva ins Behandlungszimmer nei gfiehrd – und der Friedrich iss widder aus'n Schdauna net raus kumma: Schtadds ana haddn Briddschn iss'er vor an waach'n Rundbedd gschdandn, auß'nrum lauder Schbiegl.

„Ich bi fei bloß a Kassn-Bazient“, hot der Friedrich gsochd, obber die Eva hot aweng mit die Aangdeggl geglimberd. „Du Witzbold“, hot'sa in ihr'n Russisch-Deidsch gsochd, „häng Hose über Bügel, damit wir können anfangen“.

Der Friedrich hot immer nuch gedachd, daß'er von derra sibirisch'n Heilerin ezerd gleich a erholsama Rigg'n-Massaaschn grichd – und erschd wie na die Eva

schdadds an seina Lendnwerbl ganz wo annerschd hii gelangd hot, iss'na der Saafnsieder aufganga. Er iss droz seiner erheblichn Greizschmerzn ziemlich schnell auf die Baa gschbrunga, hot hasdich sei Husn widder ogezoong und iss von der Eva ihrer Diir naus gewerchd. „So a Schnalln“, hot'er vor sich hii gemurmlt, „ezerdt iss in Hof fei aa scho Gomorrha und Soda...“